

UGOVOR

O PRUŽANJU USLUGA REDOVNOG GODIŠNJEG SERVISIA SUKCIJE

zaključen dana _____ 2021. godine u Sarajevu između ugovornih strana:

1. **Stomatološki fakultet sa klinikama**, Sarajevo, Bolnička br. 4a, kojeg zastupa dokan prof. dr. sc. Muhamed Ajanović (u daljem tekstu: **Naručilac**)

Identifikacioni broj: 4200542470007
Poreski broj: 01073987
Transakcijski rn: 1411965320008475
Budžetska organizacija: 2104024

2. **Sanitaria Dental d.o.o.** iz Mostara, Ulica Blajburških žrtava, br. 23 kojeg zastupa Ivan Galić (u daljem tekstu: **Izvođač**)

Identifikacioni broj: 4200899030005
Poreski broj: 200899030005
Transakcijski rn: 3386902212050389

PREDMET UGOVORA

Član 1.

Predmet ovog Ugovora je izvođenje usluga redovnog godišnjeg servisa sukcije na Stomatološkom fakultetu sa klinikama, koje će Izvođač izvršiti Naručiocu u skladu sa odredbama ovog Ugovora i tenderskom dokumentacijom Naručioca broj: 02-2-1-48-72-11/20 od 16.12.2020. i Ponudom Izvođača usluga broj: 02-2-1-48-72-17/20 od 14.01.2021. dostavljenom po otvorenom postupku za nabavku usluga redovnog godišnjeg servisa sukcije na Stomatološkom fakultetu sa klinikama Univerziteta u Sarajevu.

Izvođač usluga se obavezuje da predmetne usluge izvede stručno i kvalitetno u skladu sa Tenderskom dokumentacijom Naručioca i ponudom Izvođača usluga držeci se tehničkih propisa, pravila i standarda i pozitivnih propisa koji uređuju predmetnu oblast.

Ponuda Izvođača usluga je u prilogu i čini sastavni dio Ugovora sa specifikacijom usluga.

CIJENA

Član 2.

Naručilac će na ime izvršenih ugovorenih usluga iz člana 1. ovog ugovora Izvođaču isplatiti:

Cijena bez PDV-a: 24.820,00 KM
Porez na dodanu vrijednost (PDV 17%): 4.219,40 KM
Popust: 0,00 KM
Ukupna vrijednost / cijena sa PDV-om: 29.039,40 KM
(slovima: dvadesetdevehtiljadatridesetdevet i 40/100 KM).

Član 3.

Cijena iz prethodnog člana utvrđena je na osnovu vrsta, količina i jediničnih cijena iz Ponude Izvođača / Specifikacija usluga.

Ugovorene jedinične cijene su fiksne i ne mogu se mijenjati ni pod kojim uslovima.

NAČIN IZVOĐENJA I ROK ISPORUKE

Član 4.

Izvođač se obavezuje da će izvođenje usluga redovnog godišnjeg servisa sukcesije vršiti po dostavljenom zahtjevu / narudžbenici Naručioca usluga u kojoj će biti naznačene vrste usluga najkasnije u roku od 15 kalendarskih dana od momenta dostavljanja narudžbenice od strane Naručioca.

NAČIN PLAĆANJA

Član 5.

Naručilac će izvršiti plaćanje samo nespornih usluga izvršenih / urađenih po ovom Ugovoru i ovjerenih od strane odgovornog lica.

Plaćanje će se vršiti nakon izvršene primopredaje ugovorenih usluga bez primjedbe, a u roku 30 (trideset) dana od dana dostavljanja fakture.

Plaćanje će se vršiti na transakcijski račun Izvođača br. 3386902212050389 otvoren kod UniCredit banke.

OBAVEZE NARUČIOCA

Član 6.

Naručilac se obavezuje da:

1. Obezbjedi Izvođaču nesmetan pristup prostorijama fakulteta za potrebe vršenja redovnog godišnjeg servisa sukcesije;
2. Organizira primopredaju izvršenih usluga – atestna dokumentacija o izvršenom redovnom godišnjem servisu sukcesije, u roku od 7 dana od dana prijema obavijesti od Izvođača usluga o završetku predmetnih usluga;
3. Izvrši plaćanje izvedenih usluga na način i u rokovima utvrđenim ovim Ugovorom.

OBAVEZE IZVOĐAČA

Član 7.

Izvođač se obavezuje, naročito:

1. Izvesti usluge na način, u rokovima i po cijeni određenoj Ugovorom i tehničkom specifikacijom;
2. Izvoditi usluge u skladu sa tehničkim mjerama, propisima, normativima i standardima koji važe za izvođenje predmetne vrste usluga;
3. Pridržavati se u potpunosti ovog Ugovora na osnovu kojih se izvode usluge;
4. Dostaviti ateste uređaja (sukcije) da je izvršen redovan servis;
5. O svom trošku otkloni sve nedostatke na izvršenim uslugama koji se eventualno utvrde u toku izvođenja usluga, a na zahtjev i u roku koji odredi odgovorna osoba Naručioca;
6. Otkloni sve nedostatke prilikom primopredaje usluga u roku koji odredi odgovorna osoba Naručioca za nadzor,
7. Snosi sve eventualne štete prema trećim licima prilikom izvođenja usluga, odnosno nastalih kao posljedica izvođenja usluga;

UGOVORNA KAZNA

Član 8.

U slučaju prekoračenja roka za izvršenje usluga i primopredaje usluga iz ovog Ugovora, Izvođač se obvezuje platiti Naručiocu ugovornu kaznu u visini 0,5% od ukupne vrijednosti ugovorenih poslova za svaki kalendarski dan prekoračenja roka iz člana 7. ovog Ugovora. Ukupna ugovorna kazna ne smije prelaziti 10% ukupne vrijednosti ovog Ugovora.

Plaćanje ugovorne kazne ne oslobađa Izvođača usluga obaveze da u cijelosti završi i preda Naručiocu izvršene usluge.

Ako Naručiocu nastane šteta zbog prekoračenja ugovorenog roka završetka usluga u iznosu većem od Ugovorne kazne Izvođač usluga je dužan da plati Naručiocu pored ugovorne kazne i iznos naknade štete koji prelazi visinu Ugovorne kazne.

STRUČNI NADZOR NARUČIOCA

Član 9.

Naručilac ima pravo da vrši stručni nadzor nad uslugama Izvođača radi provjeravanja i obezbjeđenja njihovog urednog izvođenja, naročito u pogledu vrsta, količina i kvaliteta usluga, i predviđenih rokova.

Izvođač je dužan da Naručiocu omogući vršenje stručnog nadzora.

PRIMOPREDAJA IZVEDENIH USLUGA

Član 10.

Izvođač će odmah, a najkasnije u roku od 7 (sedam) kalendarska dana, nakon završetka provedenih usluga u pisanom obliku, obavjestiti Naručioca da su ugovorene usluge izvedene.

Naručilac i Izvođač su dužni da pristupe primopredaji izvedenih usluga u roku ne dužem od 7 (sedam) kalendarskih dana računajući od obavijesti iz stava 1. ovog člana. O primopredaji

izvedenih usluga sastavlja se zapisnik u roku ne dužem od 3 (tri) kalendarska dana od pristupanja primopredaji izvedenih usluga.

Svaka ugovorna strana pismenim rješenjem / odlukom određuje svoje ovlaštene predstavnike za obavljanje primopredaje.

Ovlašteni predstavnici ugovornih strana sastavljaju zapisnik o primopredaji izvedenih usluga koji sadrži, naročito sljedeće odredbe / podatke:

1. da li su usluge izvedene prema Ugovoru, propisima i pravilima struke;
2. odgovara li način izvođenja usluga i kvaliteta izvedenih usluga ugovorenim, odnosno koje usluge izvođač o svom trošku mora doraditi, ispraviti ili ponovo izvesti, u kojem roku to treba učiniti;
3. rok za otklanjanje konstatovanih nedostataka;
4. datum završetka usluga i datum izvršene primopredaje.

Zapisnik o primopredaji može sačiniti samo jedan ugovarač bez učešća drugog ako drugi ugovarač neopravdano odbije učešće u primopredaji ili se neopravdano ne odazove na poziv da učestvuje u primopredaji. Takav zapisnik se dostavlja drugom ugovaraču. Danom dostavljanja zapisnika nastaju posljedice u vezi sa primopredajom.

Ukoliko se u zapisniku o primopredaji obostrano konstatuje da Izvođač treba o svom trošku da doradi, popravi ili ponovo izvede pojedine usluge, Izvođač je dužan da odmah, a najkasnije u roku od 5 (pet) kalendarskih dana, pristupi izvođenju tih usluga.

Ako Izvođač ne izvede usluge iz prethodnog stava ovog člana u primjerenom roku koji mu ostavi Naručilac, Naručilac može da angažuje drugo lice da ih izvede.

BANKOVNE GARANCIJE ZA OSIGURANJE IZVRŠENJA UGOVORENIH OBAVEZA

Član 11.

Izvođač je, u smislu osiguranja izvršenja obaveza po ovom Ugovoru, obavezan Naručiocu, dostaviti sljedeću безусловnu originalnu bankarsku garanciju (prema formi / obrascu utvrđenom od strane Naručioca):

- garanciju za uredno izvršenje ugovora / dobro izvršenje posla u iznosu 10 % ukupne vrijednosti Ugovora, sa rokom važnosti garancije: 60 dana.

Izvođač će garanciju iz prethodnog stava dostaviti u roku od 7 (sedam) dana od dana zaključivanja ovog Ugovora / obostranog potpisivanja ovog Ugovora.

Garancija za uredno izvršenje ugovora dostavlja se u originalu. Garancija ne smije biti ni na koji način oštećena (bušenjem, i sl.) jer probušena ili oštećena garancija se ne može naplatiti. Ukoliko garancija za uredno izvršenje ugovora nije dostavljena na propisan način, shodno uslovima iz tenderske dokumentacije i u roku iz prethodnog stava, zaključeni ugovor će se smatrati apsolutno ništavim.

RASKID UGOVORA

Član 12.

Naručilac može raskinuti Ugovor jednostrano u slijedećim slučajevima:

- 1) ako se Izvođač usluga ne pridržava ugovorenih obaveza, odnosno ukoliko grubo krši odredbe Ugovora;
- 2) ako Izvođač usluga ne izvede usluge u ugovorenom roku, izuzev ako je za odstupanje data pismena saglasnost odgovorne osobe Naručioca;
- 3) ako Izvođač usluga izvodi usluge nekvalitetno i neizvršava poslove po nalogu odgovorne osobe Naručioca,
- 4) ako Izvođač bez pismene saglasnosti Naručioca ustupi trećim osobama izvođenje pojedinih usluga koji su predmet ovog Ugovora;
- 5) ako Izvođač dođe u situaciju da ne može izvršiti svoje obaveze iz Ugovora;
- 6) ako je neopravdano zaostajanje u izvođenju usluga;
- 7) ako Izvođač usluga ne otkloni nedostatke po primjedbi odgovorne osobe Naručioca

Ako Naručilac raskida Ugovor zbog neizvršenja ugovornih usluga od strane Izvođača usluga, Naručilac može raskinuti Ugovor, nakon što Izvođaču usluga da primjereni naknadni rok za izvršenje ugovorenih obaveza, a Izvođač usluga ni u naknadnom roku ne Izvrši svoje obaveze.

Član 13.

Ugovor se raskida izjavom u pisanom obliku koja se dostavlja drugoj ugovornoj strani.

U izjavi mora biti naveden razlog zbog kojeg se Ugovor raskida.

Član 14.

Ako ugovorne strane sporazumno raskinu ugovor tim sporazumom regulirat će sva pitanja nastala povodom raskida ugovora.

XII OSTALE ODREDBE

Član 15.

Sve izmjene i dopune ovog Ugovora mogu se vršiti samo uz postignutu saglasnost ugovornih strana i zaključenje pismenog aneksa ugovora.

Član 16.

Izvođač nema pravo zapošljavati, u svrhu izvršenja ugovora o javnoj nabavci fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala komisija za nabavke, najmanje 6 mjeseci po zaključenju Ugovora, odnosno

od početka realizacije Ugovora, a u skladu sa Zakonom o javnim nabavkama Bosne i Hercegovine ("Sl. glasnik BiH", br.: 39/14, član 72. stav (6)).

Član 17.

Ovaj Ugovor stupa na snagu danom potpisivanja i uvođenja u posao od strane ovlaštenih predstavnika ugovornih strana.

Svi rokovi u vezi sa ovim Ugovorom računaju se od dana stupanja ugovora na snagu, ukoliko posebnom odredbom nije ugovoren neki drugi datum kao početak toka roka.

Član 18.

Ugovorne strane su saglasne da će, u slučaju, da pojedina pitanja, vezana za izvršenje obaveza i ostvarivanje prava po ovom Ugovoru, istim nisu regulisana, primjenjivati odgovarajuće odredbe Zakona važećih za predmetne nabavke i Zakona o obligacionim odnosima.

Član 19.

Ugovorne strane su saglasne da sve eventualne sporove koji nastanu iz odnosa zasnovanih ovim Ugovorom prvenstveno rješavaju sporazumno.

Ukoliko se nastali spor ne može riješiti sporazumom, za rješavanje spora određuje se nadležni sud u Sarajevu.

Član 20.

Ugovorne strane su saglasne da sastavni dio Ugovora čine: Tenderska dokumentacija Naručioca i Ponuda Izvođača usluga.

Član 21.

Ovaj Ugovor je sačinjen u 4 (četiri) istovjetna primjerka od kojih svaka od ugovornih strana zadržava po 2 (dva) primjerka. Svi primjerci važe kao original i imaju jednako pravno djelovanje.

IZVOĐAČ
Sanitaria Dental d.o.o.



Ivan Galić, direktor

NARUČILAC
Stomatološki fakultet sa klinikama


Dekan, prof. dr. sc. Muhamed Ajanović

Sarajevo, 15.02. 2021.

Broj: 44/2021-1



Sarajevo, 01.02.2021.

Broj: 02-2-1-48-72-22/20

